

勉行堂詩集

勉行堂詩集卷二

古歛 程晉芳 魚門

春帆集

起戊辰盡庚午之二月

平山堂看梅

東風盡日吹芳陌，新柳絲絲初弄碧。平山堂下試探春，靜院飄香梅早折。開先幸少蜂蝶戀，候冷猶遲車馬客。雖臨粉堞傍朱欄，落寞何殊映江驛。紅跗絳萼風骨在，未覺穠姿減高格。常時看梅亦大好，况對殘山緬遺跡。花開花謝昔人非，欲證諸空寫愁劇。烟昏日暝未能去，更待東方蟾彩白。霜華滿地照疏影，十斛塵襟頓消釋。金尊玉管涉嘲轟，卻撫茶甌坐苦席。五年兩度廣陵春，但記存園與今夕。不辭重到壑吾巾，風雨還須蠟屐屐。存園賞梅

種梅多用桃根接比似夫人隨婢妾老梅邗上數存園雪幹生
皮無假攝開花散馥倍清異無垢真仙脫塵劫繞欄傍檻三十
樹葩鬪香中引行屨凌風却月總奇致暢好臨摹歸畫篋世人
但賞香與色逸態橫斜幾經曉有如一畝翠琅玕須看風枝和
雨葉成陰結子終自好未怕吹寒笛初壓就中點綴頗深邃桂
樹連蜺石稠疊沉吟恨少十日留輸却狂鶯與新蝶斜陽滿地
悵言歸點點繁英衣袂裏

漢宮詞五首

羅袂塵生碧草滋哀蟬落葉總堪悲燈光帳影分明見不似秋
衾覆面時

黃金不惜買君恩月色花光幾翻新卻恐相如多狡獪更將詞
賦售他人

悲辭戚里望靈塵
零落紅顏及早春
背塞紫臺甘薄命
畫工休誤後來人

海棠風緩怯吹衣
翠羽明璫映錦幃
赤鳳歌闌宮樹晚
一雙新燕拂簾飛

蟲網蛛絲扇已捐
萋萋綠草上階繁
紫茸帳冷犀簪折
玉露寒時奉寢園

古別曲

君又出門去微身何所依
徒將熒熒淚墮向深深
卮婦人守闥闌
男子持門戶
君今慕遠行
中外獨妾主
苦辛誠所甘
期君往如願
關山寒暑多
游子情應倦
成名宜早歸
勿厭田園客
秋燈月明明
子讀妾夜織

諸杏程饋惠泉水答之以詩

神泉誰復窺中冷惠山乃以第二名太直俯首愧流品此論未
公吾不平料量人物貴適用豈以實美輸虛聲平生別水如別
酒羔羊遠遜茱萸清淮水甘肥恨稍濁下中李蔡煩譏評近來
黃流倒浸灌浮沙迸礫難爲情梁溪友人知我意吳船載贈連
缸罍開緘澄潔映眉宇想見溜石綠芳蘅未遑活火薦松本試
以指掬神先瑩吾子於泉若外府長物祇此無餘贏朝饑夕飢
不暇給挑菜浪軟還遐征鄉泉購致引歸思鹽豉彷彿誇蓴羹
君不聞衛公驛遞長安城膏脉一綫遙還縈從來太美集所好
近取不敵遠者營小牕羅羅風日明浮甌碧葉花乳輕終思與
子就泉汲山楹坐聽秋蟬鳴

新柳

渲染煙光色未深垂垂已近碧波潯馬嘶山巷憐新別人着輕

衫動曉吟舞向斜筵矜好態誤他啼鳥出高林坊西一帶花如綺誰遣風懷老不禁

次韻石亭儲丈見贈

江皋晴雪緬前期握手猶嫌會面遲破夢茶香聊醒酒撲簾花氣又催詩客中心事驚蓬鬢邇水煙光在柳絲行卷定知饒旅思畧教吟對遠山眉

春日登帆影樓題贈在中上人

雕甍疊層雲修簷碍飛鳥暖風撲四牖乘興一登眺始知天地寬頓覺河山小千帆落日明萬井晴烟繞一水漾餘清東逝接銀島彩蜃現樓臺紅霞遮巘嶠疑有羽衣人吹笛來縹緲或恐古蛟龍怒湧波浩淼老僧無住心偶此涉昏曉指月向秋圓拈花對春皎廓然俯大千高視出塵表頗聞西方義夙悟千偈了

得閒卽眞詮輕出誠小草願得共幽棲遐景愜深討

柳絮

輕於花片軟於絲綺陌春晴漾曉烟野店乍榮沽酒旆香溪還
撲釣魚船緩隨游子衝雲騎閑拂騷人落墨箋點點新萍依綠
浦可知飄泊舊因緣

夢中作

東風吹碧雲搖漾作微雨堦前白桃花開落惜無主美人一去
翠簾空新月猶懸舊牕戶

新陰十韻

冉冉覆閒門愔愔帶遠村藏鶯纖露羽映水碧添痕日薄纔能
障牆高漸欲援雨餘初覺重風急已成喧祇益池亭邃全消蜂
蝶繁低枝堪繫馬密蔭試移樽院冷苔隨長堦斜月易昏暗應

連竹圍濃恐誤桃源醺醺殘芳綴霏微弱露翻高樓春望久葉
葉總銷魂

曲江樓懷舊同儲茗坡作寄李芋圃兼東路直夫

珠湖湖水涵天碧獨上高樓思遠客柳彈柔絲委麴塵繞堤芳
草紛如積草綠波平似昔年舊遊歷歷在當前孤懷落寞逢今
雨良友分攜隔斷煙斷煙樓閣斜陽裏曾記幽人此棲止短棹
閑尋叩竹扉蕭湖夜月拏蘭芷花發紅蘭裊素枝幾同相見慰
相思芍藥春亭閒命酒梧桐秋館共題詩詩籌酒尊韶光度祇
愁鷓鴣催詩暮無恙蒲帆十幅風吹人却向秦淮住秦淮一帶
水迢迢滿目山川憶六朝桃葉香生看紫艇綠楊烟冷聽吹簫
簫聲月色頻相訪旅病逢秋倍惆悵乍入詞場試八叉置身還
擬從天上天上人間自此分幾人爭折月中芬擁衾歸卧淮干

雪並轡遙衝薊北雪雲開太液晴輝射靈鵲何期依丙舍尺五
迴翔歎故人枝棲重託湖邊樹樹冷飄紅倦鳥啼繞廊覓徧舊
時題花繁遠憶蘭陵驛樹密還疑罨畫溪蘭陵罨畫悲離索問
我行藏近何若垂簾卜易類君平隱几噓天肖南郭獨有傷今
感昔遊每逢佳處不勝愁錦箋遙付離亭燕爲寄吹香杜若洲
送儲茗坡南歸

隔浦初煙漾暖雪攬衣風絮愴離羣江南四月清陰滿芍藥花
時獨送君

六月中浣儲茗坡家萼江兄過訪同集舍弟述先齋中看
紫薇花作

炎官出火蒸肉山黎牀困卧鍵幽關忽聞牆西兩佳客披襟倒
屣愁開顏老兄冒次太磊砢松栝萬本攢烟鬟談天進士握雕

管有似壯士開黃開髯乎自笑頑石頑阿弟病骨清且孱相看
雙落等無用芳樽野席頻往還丰茸紫殺妖且閑雙株競發照
座殷竹娟荷淨不稱意春姿乍轉煩幽攀憶昨殘春始抽葉繁
枝細葉兄爲刪預期花開錯錦綺到今撲眼紅雲斑文章小技
亦爾爾要闢蕪雜除榛菅餘霞滿天織魚鱗落日傍戶低銅銀
堦除碧色不可唾晚風淅淅吹蒲萼坡公觸境起禪悟虛白妙
句留人寰無涯物化有涯客閱人每恨花凋爛吾儕達生作何
計青林一抹連漁灣絲綸縱好苦拘縛一銖不足酌千錢爲君
長嘯更起舞仰視素月當空彎

中秋同人泛舟珠湖作

新霽逢佳節疏舫且共揚人皆待明月我獨戀斜陽水濶蘆初
白天寒菊有芳依依幾株柳暮色似橫塘

雜題周牧山畫八首

灘聲雲影共悠悠
冷葦疏煙不耐秋
無恙月明溪上樹
夕禽棲穩在枝頭

春申浦上潮初落
楊子津頭雨欲來
擬借片帆風力便
探奇直到越王臺

五載江南兩度遊
探山臨水意難酬
觀圖忽軫前塵想
古塢寒雲接渡頭

密林擁秋刹
雨勢來未已
疑有六朝僧
憑欄看煙水

十斛新螺染斷山
竹枝蕭瑟水雲間
江南到處渾如此
自笑能拚幾日閒

泠泠七絃聲
搖曳在深竹
不知微雨來
颭破芭蕉綠

亂鴉聲急雪來初
樹老雪深閉野廬
下若酒香還獨飲
梅花幾

點照修書

疏林清籟響濺濺九月霜寒落木天斜陽已沒澹煙暝古渡月
明聞扣舷

詠史

玉樹遺歌恐未新更翻小部進楓宸驚笙夜奏梧宮月鼙鼓遙
驚荻港塵齧臂荒君鵠化魄伏設雄將血成燐雙蛾愁絕瓊車
去下策何知出老臣

江行曉霽

江風送曉寒雨歇天始朗稍稍宿霧收灼灼晨霞上紅日出海
門波光相晃漾遠山互盤鬱樹色雜青蒼渚遠落沙禽村虛挂
魚網中流散遙目嘯詠發孤賞明日石頭城垂楊繫煙榜

金陵飛雲閣

傑閣憑大虛烟雲恣繚繞吐納通百靈歛吸接群島想像吹笛
人跨鶴去已杳何年遺壯構陵空獨縹緲如聞天雞唱萬籟沸
松杪玉繩耿明月虛白生懷抱此身亦等閒寂觀越塵表白衣
與蒼狗變化徒擾擾感此笑浮名一覽八荒小

飛霞閣

朝霞升於東茲樓在其西光影一煥耀萬象皆陸離曉日盪奇
彩夕月揚明輝餘晶濯華綺散作千虹蜺城堞列雄觀嶺岫迴
幽姿置身霄漢間丹翠盈秋衣羽客煉鴻寶高人結巖樓願言
接盧敖從此攀天梯

舟中晚興

夕波有餘清澹漱作文綺初月出前峰蒼茫深樹裏遙空斷雁
滅極浦孤烟起矗矗翠苔磯驛亭天半倚舟行圖畫中倏忽度

百里何日此移家看山復臨水

從軍詞四首

六月我嶢道牙旗雪壓偏笳添邊馬勁月挂漢營圓曉出驄星
檄宵歸卧錦轡上公饒將畧計日凱歌旋

雪嶺經年戍璇闥二月春園花空有淚塞草不曾新念遠金錢
擲緘愁錦字頻捐軀休顧返名字上麒麟

飲馬河源水蕭蕭大樹秋冰穿雲騎甲血獻月氏頭玉界千軍
入金城一箭收戰場霜色冷燐火向宵流

鐃吹喧雲棧悠悠捲旆旌元戎方耀武

聖主不加兵擊劍垂貂帳鳴鞘列柳營蒲梢天馬隊來自武師
城

舟中清明

野風吹雨又清明綠浪紅亭數客程澤國煙深惟見柳淮千春
盡不聞鶯幾行殘雁和雲遠一片飛花入棹輕卻憶曉窗初睡
起隔牆時過賣餠聲

和史廣文梧桐懷隱三首

侏儒飽死朔終饑剩欲安心住翠微石筍穿雲侵客屨山花和
雨落秋衣村依雜樹鶯初乳門對寒塘雁獨飛三徑漸荒苔草
長連江紅葉一帆歸

倦飛高鳥尙知還與世浮沉只等閒浦裏新荷堪比淨磯頭危
石可鐫頑多栽榆柳教臨水盡去窗櫺好對山五架三間書萬
卷天公乞與未應慳

慧業從知自懺除朱塵那得稱閒寄石華滿地懷仙隱柿葉題
堦寫道書巖岫棲遲松檜老江湖踪跡鷺鷥如黃山正似華陽

好簪笠烟蓬計未疏

同家泚江伯父隨園看芍藥作

東晉菴頭初日旭村村流水緣塍綠偶隨杖屨出晴臯紅藥圍
林散幽矚入門一笑花如海千畝奇芬清露沃周迴錦砌有萬
叢掩映雕欄凡幾曲圓丁向我語殷勤花信猶遲來苦促那知
妙境在初開不待十分看已足昔年頗聞花最盛大者如盤堆
火玉竭來此地冶遊人寶馬香車相繹屬銀燈四照按笙歌金
碗連揮醉醺醺爭濃鬪豔列紅裙月鬢風鬟競妝束廿年往跡
漸凋零一種清涼替繁縟清言緒論坐花底縱覺寂寥差兌俗
豐臺異種近無多廣陵盛事難重續祇今勝跡付淮千回首滄
桑少成局狂香浩態知幾時雨夕風晨又爭斷急須配食牡丹
王徧采芳名歸譜錄

黃葉二首

打魚灣接葦村偏幾樹蕭森脫冶妍去棹孤行寒雨裏離人相對夕燈前月明古巷聞殘杵風過荒城咽斷蟬寂寂蒼苔清露重白頭吟罷益悽然

半欲飄零半著柯斷橋影裏石坡陁已分野色隣深竹不遺餘愁向敗荷收盡涼烟殘日隱映來荒剝暮雲多西陂流水成蕭瑟又見飛鴉作陣過

寄家縣莊先生四首

太虛本無象道心得其微列聖有真傳大易示其機子雲本妄人談元良已非遙遙二千年聖籍掩明輝蹈虛涉偏畸術數徒卑卑端居求自理愴怳令心悲

心悲何由竭江介有君子水木共根源鍾質獨奇美讀書窮萬

卷倚馬成七紙注易向幽廳廓清功最偉靈蛇珠已投匣劍光
初起雜誦幾留連積思消填委

積思鬱沈沈新涼素秋節荷衣散遠香蟲響逾哀切伊人棹扁
舟尋訪來幽室高論溯黃虞清言及詩律中情潛以紆復此輕
離別寂寂坐相思空庭桂花發

花發暮江頭清風送客舟解纜迎新月擊楫過中流離懷方縑
縑篇翰復綢繆愧無古人風瓊玖勞相投願言保珪璋珍譽垂
千秋隨時愛景光此外亦何憂

懷人詩十八首

江霧忽披霽嶄然見高峯山鳥寂不鳴鳳凰在孤桐縣莊抱素
節文學超吾宗步規趨則矩氣象何雍容讀書探理窟著易參
天工下代百氏言精究靡不通惜哉不一遇將以名山終碧月

隱孤雲空谷非蘭叢誰爲貢玉堂絕勝楚兩龍

族祖廷祚字敬生號綠莊

董圃博群書三禮更精討河東第已高太白名豈小狂論太匆

匆白衣返林表西湖烟水深一棹恣縈繞招鶴綠雲秋尋僧紅

葉曉棋拚春墅輪飲愛老兵好靈鷲立三山下視皆凡鳥

仁和杭世

駿字大宗號董圃

華陽古洞天紅泉映碧樹芝草有時芳白鹿來何處中有悟岡

仙蒼蒼隱烟霧來遊塵世間釋褐遵王路淮水坐清蘊蕭齋製

貧賦繡佛且逃禪攝生常茹素定後月銷華吟餘竹垂露長懷

故山秋猿鶴怨遲暮一笑徑拂衣梅花落無數

金壇史震林字公度號悟岡

麟經傳大義璀璨如日華後儒昏不知聚訟同鳴蛙偉哉左舍

翁白首窮搜爬董子不窺圖伏生老無牙以茲視古人風尙何

以加廓然雲翳清灼灼舒晴霞一編走四極功績靡津涯此老

今碩果身影無欹斜衣垢懶濯澣但頌酒德嘉兩目雖短視青
燈塗嫩鴉出門不識路歸途忘其家後生笑腐儒末俗堪咨嗟
豈以太古音儼彼箏笛瑟

無錫顧棟高字震滄一字左齋

一觴詩百篇倚馬萬言就景汀毘陵雄著作等身富擊楫度空
江悵然望雲岫得句夕暉斜懷人群木秀瑤草不徒芳鸞鸞豈

輕覲

陽胡問字標侯一字景汀

江南有丹樹迎暖振芳榮移栽苦寒地灼灼仍倚英鍾君浙東
人長養自北平師事望溪氏動止秉禮經一旦執親喪泣血幾
隕生朝夕莫且哭鷄骨自支撐此禮今不講此君饒至情烏從
冠上棲燈向墓間明卽此足千古餘藝何煩評

北平鍾晚字顯暇號集虛

浩亭抱高清亭亭秋月映沈腰衣帶寬潘鬢霜華凝研精文選
理綺麗發幽覲掩卷吟四愁揮毫成七命鳴琴銷篆烟彈棋照

燈檠倦眼送殘花傷春獨成病

山陽邱蓮字庸
謹一字浩亭

一諾重邱山爲友輒輕死俠骨繡心腸
君欽魏公子不師賀殪傳而愛草木
史黃金來滿前側目非所喜值僕請揮
斥一散旋空矣時時發長嘯落日千山
紫驚起隔江鷗拍拍墮烟水

廣昌魏尤

迪字懸堂

絲莊有難弟南耕實淹貫植學本六經
摛文追兩漢既精河渠書而擅豎亥算
兵農及刑名指畫可立辦堪充棟梁具
豈作耳目翫蹉跎芙蓉幕青鬢日彫損
珠光隱塵沙琴材受炊爨渺渺大江秋
矯首發三歎

族祖嗣章號南耕

孟亭古之狂酒酣工罵詈既擅步兵才
而挾灌夫氣山公習池歸拍手笑童穉
曹參尚無爲齊國乃大治林泉愜古歡
詩筆騁

雄麗哀柳白門秋沈吟何處醉

白田王儼與字孟亭

凡民髯絕倫幽意肖蘭竹佳懷罄朋友善氣迎童僕作令難理
頌雅足鎮風俗嗜古具深心鑒別眼如燭大篆垂此珠小篆披
華玉丹砂小印紅土暈銅匱綠圖譜繼宣和評跋仿坡谷閑師
輞川筆慘澹繁尺幅鳴禽在幽篁空山多古木會得化工心蕭
然抱幽獨

江陰沈鳳
字凡民

錫山盛名流景范近爲最藕漁及蒼峴各各騁才思後來顧左
番經學堪接袂晚出誰更優師道信奇器俯觀江漢濶仰視星
辰大卷起萬頃波向人資灌溉駸駸類書溢耿耿忘夜寐吾聞
食鷄者多食蹠爲快斯人吾所欽林壑期把臂

無錫華玉
淳字師道

鑑堂野鶴姿毵毵不輕舞白眼觀天下短筇尋道侶心遊祇壇
域身作湖山主冉冉南天雲飄蕩來袁浦解帶量長松墊巾逢
薄雨瘦馬過桃溪芳船度烟渚指點靜中因林端新月吐

山陰
楊策

字鑑

八十納姬侍飲谷真情癡白蘋吹暮雨紅豆發新枝幾卷小名錄數行離思詩繁花深幕隱鳳管夜船吹黃梅折欄邊玉臺遺所知清宵搔白首怨煞汝南雞

常熟趙虹字飲谷

淮陰吳山夫篤學攻爾雅蟲魚誌名類亥豕辨真假秋風動棘闌襍被棲白下一卷少陵詩盡日手中把萬事不關心兀坐梅

根冶帖括日紛紛那得如斯者

山陽吳玉搢字山夫

寒花無冶姿貧士無歡顏嗟嗟吳敏軒短褐不得完家世盛華纓落魄中南遷偶遊淮海間設帳依空園聽聽紙響檄檄庭樹喧山鬼忽調笑野狐來說禪心驚不得寐歸去澄江邊白門三日雨竈冷囊無錢逝將乞食去亦且賃春焉外史紀儒林刻書何工妍吾爲斯人悲竟以稗說傳

全椒吳敬梓字敏軒

四海習鑿齒白民天下重送窮製新文迎臘倒蘆甕借書輒手
抄掩戶仍維誦曾誇射鵬手揚葉何難中朔騎夕笳催江帆涼
雨送徘徊芳春林宛轉聽禽哢

山陽周振
采字白民

吟暉信天民青霞鬱奇思纏綿寓閨房感激託文字黃葉徧長
安頻看促歸騎孰云天下名將老困騏驥生平朋友心落日圍
林意痛哭向秋風斯人尚窮滯

族兄茂字蓀
江別號吟暉

酬袁存齋四首

江介多清風淅然白雲起芙蓉一片秋直渡澄江水江水接淮
水悠悠千里長所思在天末一夕在我旁庭花爲君開庭草爲
君翠纏綿贈我詩愴惻別我意別我去江干江頭多曉寒離情
何可道黃葉滿前山

醴泉比孝子養道無不周人生得事親此外亦何求賢者愛惜

日一喜還一憂肯使百年內獨爲我春秋君方及壯齡二親俱
白頭毅然謝長官解組歸林邱上堂問寒燠入廚視珍羞父母
既欣欣室家無怨尤羨君有此福我淚空交流

朝見雲出岫暮見雲歸山如何歸雲少不似出雲繁美人如春
花氾露開芳顏忽爲孤松姿聳翠幽巖間野石無卑姿野水無
驚瀾共君酌野酒視彼倦鳥還

淵明卧柴桑高韻得神理蘇州靜焚香詩骨清無比山來作詩
人貴在脫塵滓聞君有名園乃在荒山裏因山高下勢結構最
幽美竹樓間草亭樹老石齒齒庭前種蘭竹屋後栽桃李終日
坐其中據梧時隱几客去不關門客來不倒屣春禽鳴一聲晴
花弄餘蕊明月入秋池涼雲化爲水我吟隨園詩意象正如此

送舍弟述先之廣陵

河橋一攜手碧柳未成絲春水方生夜孤帆獨去時岸荒人語
少雨急雁飛遲亦識前期近其如愴別離

勉行堂詩集卷之三

古歛 程晉芳

索米集

起庚午三月盡一年

將赴京兆試同人相餞晚甘園留別

原八首今僅存二首

綠暗郊原草色齊荒涼曉山唱黃雞藏名漫擬隨龍尾學道何曾悟馬蹄良友情懷春水濶旅人襟抱夕陽低也知骨相無多福未必鈞天聽易迷

久師蒙叟貴無名忽漫勞薪事遠行似擲梟盧隨博簪試拈花草鬪輸贏清宵皓月思儔侶涼雨孤舟憶弟兄莫道歸來情味減四圍依舊擁書城

馬陵道懷古

馬陵月黑山無路火照白書看大樹伏騎爭馳萬弩開昔日龐

涓死此處豎子成名一代雄
滅龜七萬垂奇功誰言裨闕效
鬼谷十三篇本傳家風當年共
學交何篤賸也雖賢涓也毒遣
召旋將黥刑施智不如葵難衛
足忽逢齊使竊載歸上中下駟
參兵機輜車坐計勝已決強齊
乃藉刑餘威君不見張陳刎頸
原相倚解印封王還切齒假頭
已見購常山怒魄空憐墮泚水
石契蘭交起戰爭古來恩怨繫
功名輸他鷗鷺忘機甚汀月溪
風共主盟

北河

北河蒙派從流沙天乾水涸沙
日積河面洋洋十丈寬中可行
舟纔數尺土兵踏水水沒脛插
柳編洪分水徑今日東洪明日
西沙勢遊移本無定魚貫前進
皆糧艘撐篙努目尻益高舟膠
膠不得運重糧急遣分輕舫復
有民船集如蝟投隙爭先多

狡獪側左須臾陷淺灘脫衣負船聳肩背我行感此饒苦辛
酒割炙勞舟人舟人自謂得天意跂脚安眠待潮至潮來
打船尾一日舟行三十里

寓法源寺偶題四首

朱塵鹿鹿罕停機古刹千年積翠微松徑暗繁繁雨響竹廊清
漾一燈輝漸除綺語唯耽靜自顧浮踪已覺非晚磬曳烟僧院
閉定巢禽影暫相依

如如不斷定何因墜席飄茵笑此身乞食豈妨常住義叩門原
是過來人月臨午夜清無影水到澄潭靜少塵始覺昌黎太拘
礙動思收歛著冠巾

碑辭按抄字眇茫劫灰飛盡認前唐千尋樹擁三摩地一瓣香
消百戰場如意珠圓超世界化人城古閱滄桑五更驚起眠雲

客殷殷晨鐘撼石牀

先皇曾此證三明萬法歸源錫近名蓮湧金輪標色相花涵月
殿照虛清人來竹院思茶味龍起秋泉聽梵聲解脫苦空融上
諦勞生何似學無生

屢遲李坤四雨阻不至

郭門迢遞望城門綠樹飄蕭夏雨繁官舍花明開卷帙僧齋雲
白長蘭蓀靈蛇入握寧嫌耀布鼓無聲莫競喧等是天涯歎流
寓一樽何日與評論

秦關百二接崑崙到處停鞭動遠哦山關翫叢涼葉暗水生魚
網暮烟多咏懷靜夜琴舒韻惜別秋增月漾波參佐橋西士龍
住夕陽凝眺意如何

夏日旅寓遣興二首

蟬語高槐影漸移客中況味靜中知通宵屢感尊鄉夢

尊江兄北來有

期遲之不至

盡日孤吟竇意詩山鳥啼殘天曙後雜花開到露涼時

當場舞袖何堪試彈指秋風已逼期

江南長夏苦炎蒸六月燕臺氣候平遠出直教同避暑深居原不望知名隣家柳色過牆碧佛座香燈照夜清傳語雁鴻沙燕際秋來相伴好南征

夢尊江兄二首

吉夢何太短鄉夢何太頻今宵夢最好見我平生親入門一笑歡拂拭衣上塵問君來何遲試期隔三旬如何將北轅轉滯邗江濱黃金匪所希散盡翻覺珍汲汲剖瑱璠茫茫問路人別君三月餘鬢髮驚更新沿途水渺瀰衆山復嶙峋人生行旅難況此垂老身感慨欲揮淚雜聲忽催晨

蕭蕭雨打牕燈影照無寐敲枕念斯人老尙困一第長虹飲海
波白月當天際四海盡交知而無楊得意人爲野鶴姿文乏春
花媚怪底夜光投按劍輒驚視松因耐寒蒼蘭懼當門刈亡羊
且補牢及此須聘轡誰云得已遲姑慰辛勤志如何歲已秋目
斷人不至

景汀由水路南歸賦二首言別

蕭寺論文我共君短轅單舸恨輕分漫誇貫札穿楊手總屬投
戈棄甲軍近北枝無多日暖上樓人隔幾重雲名山自有千秋
業莫遣悠悠俗耳聞

先甲先庚歷苦辛侯門挾瑟竟何人筆經三折仍嫌鈍珠每雙
遺詎有神悟到空花俱是幻拂來短袖幾多塵劇憐清曉同看
鏡旅簪蕭騷各染銀

留別寶意司馬

韶春正妍柳烟蟬曾共淮山泛輕舸一樽相送去金臺欲挽君
衣無計可那知轉眼易暄涼君住幽燕翻送我人生聚散信難
量吟席歡場巧相左憶昨停驂古寺中頻熱旃旌參佛果移居
君亦傍城西紅豆詞成傾白墮風晨月夕幸追隨短律長歌競
推揣感君勗我試秋闈五合長弓施箭筈自矜揮口有瑀戈不
道橫江多鐵鎖文章自古費評論身命從知宜坎壈車絆驥
少昂藏姱女簪花誇嫋嫋無梯那得躡雲霄不帶何由結瓜瓞
西風古道葉飄黃樽酒離筵班草坐君緣薄宦此羈留揮淚含
情言瑣瑣也知世事等浮漚只合觀空效摩火名途一涉累吾
眞如雪肌膚生疥蝨此身轉運似泥丸造物從教戲搏播行當
闢宅置琴書要使心情長帖妥低徊檻戶翠筠籠繚繞池臺芳

樹裏試從味外別酸醎未必胸中著絲穎君來訪我及初春屋角寒梅香破朶

贈別劉太史印于三首

相對寂無語悵然情共深草滋舊來路絃咽離堂琴自我遊京華爨材得知音豈伊杵臼交結契惟古心秋燈雨如絲濁酒時一斟街鼓月皎皎梵鐘夜沉沉謂言此淹留尺籍期共尋碧水逝潛鯉丹峯映霜禽蕭蕭木葉飛黯黯重雲陰游子促歸騎居人多苦吟弦望合何時淚下盈衣襟

抗志師古初秘檢搜二酉未能洞虛明每恨障蔕斗君才十倍余天馬踔騰走玉清書琳瑯顧鵲披薤韭濟濟長安中俊友接踵肘自憐屏棄身難厠群賢後褊褊問歸途以此負良友篋中贈行詩璀璨列盃卣殊難爲別離差足慰寒藪讀書各勉旃奮

此著作手斜陽滿前山駐馬更搔首

是身無根株蓬轉信來去相送益悽然不如從此住城隅墜寒
葉怨角鳴荒戍燈火二三人今皆作孤注生平幾哀樂忽忽催
鳥兔勿謂余壯齡鬢絲漸添素歸慚兒女曹別殷友朋慕逝將
掩書牕楚騷釋章句遙思玉堂寒念遠成愁賦潏潏野水聲蕭
瑟離亭樹山店月微明是我夢君處

惆悵詞四首

自照青燈勘楚詞紅蘭披拂兩三枝牕前薜荔含秋雨夢到湘
君月下祠

雲擁珠樓接漢居雙眸朗映玉清書短簷亦有長貧女貪展青
箱倦裏梳

十二雲屏障曉風美人長近翠簾櫳如何永夜傳瑤瑟幽意偏

嫌錦繡叢

凡艷何堪近至尊布衣絳繅見天人尹娥滴淚含愁日妒極都緣賞識真

旅舍聞歌二首寄陸賓之侍御

舊拍新翻欸乃詞歌喉叵耐木腸兒不知此曲從誰製生恐行人忘別離

故人京闕唱驪歌又聽琵琶度玉河檢點衣衫看淚跡百年禁得幾蹉跎

還家夢

宵分夢還家兄弟對我泣憐我多苦辛感我尙羈縻我時但俯首無語重嗚咽覺來月昏黃百感忽交集憶我北行時千里負書笈語別向河干衣袂淚屢灑謂言破天飛翻作入戶蟄生平

耽讀書磨礪費墨汁豈藉博微名亦將用自立經年涉長途勞
苦不暇給有如辟穀人中復餐粟粒長轡安可施短絙未易汲
要當隱計成鞭牛荷蓑笠

三家店

獨雁唳寒水蕭蕭風滿林晚烟山店近清磬梵樓深狹路愁疲
馬寒天急暮砧遠歸仍小草博得二毛侵

雄縣

世治惟耕鑿多年失戰場波騰平野白日落戍旗黃七郡憑襟
帶三邊控井疆暮天清角起客思正茫茫

途次讀趙州志漫書三絕句

愛客寧憐笑甃頭襟懷原比孟嘗優祇今烈士披肝膽有酒何
曾奠別州

脅秦睨柱衝冠日喻蜀揮毫草檄餘名士英雄同一例藺相如
後馬相如

崇臺一去墜朝雲
所養何知艷冶身
千古蛾眉多少恨
不徒此地嫁才人

趙北口三絕句

碧水藍雲互抱環
人家住向水雲間
分明小幅江南景
只少堆螺幾尺山

迴廊一帶鎖秋烟
戶外蜻蜓繫小船
曉起梳頭對明鏡
驚鷺飛近繡簾前

白足兒郎慣水居
家家垂柳映門疏
十三舞女腰肢軟
盡日凭欄看打魚

任邱縣得家書聞婦病劇

拭淚驚看一紙書病妻氣息屬須臾浮身已逐飛蓬轉夕鏡將
隨片月孤身外閑思餘故劍掌中難耀是明珠余尚未有子嗣情知萬
事渾如夢好夢何因半晌無

途中漫成

短驛長亭倦問途經年疲憊送居諸客衣漸冷繁霜後農事將
闌小雪初無恙暮雲歸野岫多情殘柳拂征輿書空咄咄成何
計悔不江鄉伴老漁

堂堂爲友人釋愁作

堂堂復堂堂青春未老白日長雜花含烟乳燕舞遊絲落絮爭
飛颺長安少年豪且強韞囊牽犬趨長楊短衣初試鵝鴒舞細
笛更進邯鄲倡腐儒躑躅行道旁履穿裘敝神揚揚歸來破壁
懸空囊兒啼婦怨厨無糧隣翁相勸語激昂讀書何益治生良

翁言眞矣何足臧獨不見相如沽酒典鷄鵲平津老去牧豕羊
誇人富貴非所望啟期之樂樂未央幼安坐卧祇一牀璵璠韞
石豈在剖琅玕入握終生光仰天一笑看屋梁丈夫未死誰能
量吁嗟乎丈夫未死誰能量

河間獻王墓

曾昭習威儀晉臣多繁文文侯聽雅樂端冕志已昏學古良獨
難所貴探其真偉哉河間王美粹如瓊珉六籍昔遺却焚燒迫
狂秦群儒抱遺冊逃竄依荒榛古篆藏複壁口傳穎門人漢武
重儒術下詔求書頒河間最嗜學獨溯洙泗津得書獻之朝博
士共討論周禮缺冬官不惜千金珍古經出淹中一一爲編陳
考禮訂雅樂窮流復溯源景帝十三王如王誰比倫謹度自修
飭終始蒙榮恩道啟伊洛派心契顏曾醇允宜祀闕里勿論天

漬親西京與東洛抔土今何存
巋然此墳墓松柏輝千春廟貌
儼冠劍祭典昭明禋古來諸侯
王驕侈爲禍根胡不蹈芳矩大
雅吾所敦

偶見

酒鍾歌拍淺深情性火年來煉作冰
此際好參沾絮果前生應是打包僧
花明夜塢憐無主月黑秋林幸有燈
笑指青蓮臺十二休教清境污摩登

侯夷門題畫詩十二首余於李芋圃太史齋壁見之嘆諷
良久瀕行芋圃以侯詩書扇見遺作詩志之

侯生文體如奔驥掣電崩雲千里逝
錦韁繡鞅不勞施峻阪層崖豈防墜
發狂使氣氣益雄埋頭渴飲千觥空
自矜奇節類遠祖抱關擊柝將無同
昔年共我遊春墅名士座中多楚楚
放紙

寧嫌十丈長搖筆如風目如炬就中金玉兼泥沙旁觀竊笑爭
譏諱要其才氣萬人敵畢生不遇堪咨嗟殘秋獨上南朝塔大
風搖山黑雲匝忽然狂笑忽號咷滾滾江流響相雜重來淮水
颺輕舟五月尙著青羊裘題詩哭奠水南老鬼語荒忽悲咿嚶
江干作尉怪疾起一夕酖醕廁中死清流若輩濁流投造物憐
才竟如此壁間題畫十二詩我來京邸偶見之文從字順尙難
解要當配食樊宗師翰林李君書法好每道匆匆不暇草仰家
扇子寫侯詩送我遠返江南道斜行密構皆通神羲耶獻耶恐
亂真豈惟鄭重別余意君與侯生亦故人涼風十月迎馬首把
玩循環不離手流傳他日到何人寶墨殘詩俱不朽

早起

雞鳴村店白僕夫催早起鈴鐸聲郎當行入深樹裏參旗尙橫

天月魄欲沉水小車嵒嵒騰搖搖過數里憶昨初來時春餘朱
夏始綠岸維輕舟花繁草霍靡及茲孟冬交卷地北風起失路
鮮餘歡還家抱深恥吾觀釀蜜蜂勞苦爲甘美藉令無所貪其
可以已矣蒙莊言可師陶然悟生理

開山廟

野廟何年構如聞祀五丁風雷生洞壑帳殿走精靈屋染松毛
翠崖懸石髮青未須環玦擲身世慣飄零

山行雜詩五首

衆山隨我行蜿蜒不得住突然起奇峯迎面相抵牾亂禽噪深
林古屋旁荒圃空翠落濛濛下與澗泉注遙看秀嶺雲疑是隱
淪處剩欲拂征衣從茲采藥去

朝陽澹無輝霜色滿層障何人畫寒山于此列屏障經險逾出

奇妙巧非意匠長如眠虬龍圓若布帛帳森森老樹枯蕭蕭儼
儀仗兩峰各迴環拱立類揖讓仄崖響登登瘦馬踏其上失足
勢欲傾僕御色沮喪生平飽艱險屢挫氣益壯行將五嶽遊奇
詭究情狀區區一蟻垤安用損夷曠一笑策吟鞭前谿雜花放
老楓化爲人硬土欲成石苔色艷班班上有虎行跡

秋山多白雲峰勢與雲變巖岫澹冥濛礧壑互隱現有如皴染
家濃淡作素絹俄驚山無根雲氣平抹斷縈紆雲作態峰路逐
雲轉須臾長風來雲淨山悉見偉哉造化工頃刻千狀換慰此
行旅艱極目信忘倦

密林風颭颭怪石作人語樹杪激流泉迸作樹頭雨翩翩啄田
禽一一向空舉老鶴羽離披特立不肯舞山嶺壞祠廟敲側構
廊廡神像剥泥金鬼面色如土帳中嘯訓狐堦下拱禮鼠傳爲

降疫神香火近無主人生斯世間力可造化補生當澤蒼生沒
乃享鼎俎此神本無功潘祀偶叨取歲時走村翁伏臘喧社鼓
德涼勢易衰卒乃遭棄侮悠悠邪正分厥理粲可覩

蒙陰道中爲吳德疑題戴笠圖

男兒讀書如力田深耕密溉終有年金龜赤雀不足羨要使萬
物歸陶甄功成長揖謝簪組五湖一碧浮秋船無爲老死兒女
側有似籠禽長戢翼出門漫作百里行惘惘偏多可憐色羨君
吐氣如長虹詩骨爽秀中藏鋒知章醉客慣解佩方山使酒能
彎弓生向邗江長齊魯渭水灤京頻弔古閑騎欵段過嵩陽更
謁桐牕望天姥傳來戴笠一幅圖約略日午趨長途願疑飯顚
老杜甫胡乃意暇形神腴誅茅擬向盤山隱二頃秫田冬作醢
已參幻相眺雲烟更悟浮生觀菌槿我聞盤山山勢最瑰異上

有名藍七十二風過松杉雪墮翎月穿橡栗猿舒臂幽人結廬
山之巔雜花珍鳥紛眼前懸知此笠不須戴科頭箕踞山間眠
我遊京洛緇塵重歸向秋牕仍洛誦讀書萬卷未成名儒服儒
冠等無用何日攜筇訪君去樹密雲深不知處

鄭城縣南二十餘里樹色紅黃村落掩映愛其野趣以詩
紀之

化工似惜秋容瘁作意晴原出奇致平林一抹鎖蒼烟高下紅
黃間青翠村農編屋依古畦屋勢與樹爲高低君遷平仲挂簷
瓦水面拍拍飛鳧鷖細如鍼芒麥初吐鞭牛砭砭耕斷土聞道
西村被水災此地不煩官長撫遙山曲曲眉黛橫似濃似淡最
有情吳頭楚尾憶此景那知異境逢鄭城安得畫師如董米摹
寫空濛歸筆底蕭齋素壁愜卧遊十斛塵襟借磨洗回首桃林

落葉殘飈禽飛處夕風寒他年春暮重來此百里澄霞駐馬看
夢商寶意劉印于兩太史

行盡東蒙沂水濱鄉關雲樹漸相親如何一枕郵亭夢偏向春
明對故人

入江南界

巒光溪色幾尋探百六郵亭未歇驂老馬行藏今頗似征鴻心
事我全諳瘡痍可嗜寧非癖藥實閑嘗自覺甘芳草未闌霜信
緩絲絲倦柳是江南

抵淮陰界

乍入淮陰界長堤抱遠汀水鄉晴亦雨魚市晚多腥老屋知堪
補勞薪幸暫寧家人怪相問衫是舊時青

悼亡三首

揮淚房中惜別頻入門驚見繾帷新故衫在笥猶沾粉嬌女扶牀最感人銷裏藥殘三載病梁間燕去一番春漆園作達吾差解只恨歸期緩二旬

營奠營齋五七期中聞道悵歸遲真成薄倖難辭咎縱悟前因豈釋悲蛩語正當無寐夜烏棲偏近最單枝九泉玉雪兒應在定拊懷中一解頤

宛轉殘釵綴鳳皇七晨難覓反生香經年饁餉依彭澤幾日清齋傍太常此後更誰諳食性瀕行猶爲理衣箱那堪羶羶歸來候落葉繁霜賦悼亡

題橋社寄書圖

洞庭秋老斜陽紫橘葉離離映江芷傳書誰叩樹三聲聚羣龍體盡驚起當年遣女歸涇陽胭脂淚滴湖水長謂言懽愛保百

世安知困辱令驅羊延客看書悲憤集錢塘一怒波濤立青天
歎爍走崩雷六十萬人頭戢戢紅烟融曳乾霧霏芙蓉旗綽貴
主歸明珠翠羽獻上客星燈舞戟交光輝畫師冥想心精契初
爲幽憂後激厲風鬣霧鬣太蕭騷犀甲鯨牙殊猛銳想像空郊
遇客時雨工懶惰費鞭笞蒼茫故國難傳恨寂寞愁顏倦展眉
從來衽席滋憂患菅蒯姬姜卒成亂幽婚還伴柳郎歸遺廟年
年祀江岸吾聞春秋左氏記龍鬬于野元黃垂易絲此事微茫
史莫稽新圖舊傳憑虛構蠻觸紛爭竟若何珠宮貝闕有消磨
君山一點無情碧卷起吳綃夢楚波

消寒五詠

木瓜

譜稱鐵腳梨爾雅釋曰楸柯揚朝曦輝地結靈根秀暎種記宣

城朱沙暈紅皺摩挲越筒布光色潤逾溜雖非彼美貽幸免苞
苴詎盛將定窵磁氣味絕飮餌重簾隔冰雪曉起動微嗅却笑
相公諛酸香出懷袖

蠟梅

黃梅略似梅聳幹惜太勁冉冉動孤香幸未失本性更名記坡
谷態冷心逾正堪招鳳子魂合併維摩病牆西日光薄弄影雀
喧競一枝插膽銅夜永新冰凝與花澹相忘暗牕規月瑩

水仙

朝來却月盆忽覩瀟湘姿圍公善照綴徑尺含遠規白石嵌璽
瓏高下紛參差安知九畹芬遺魄方在茲呼梅合作兄厥弟殊
難爲悄悄結疏夢翠佩如我貽却尋清冷傳恍惚懷馮夷

冬菜

吾儕冰雪腸飢腥非所喜朶頤觀作酉酒食困堪恥忽欣刺齒
肥而匪肉食鄙堆盤鬱青蔥霜色上筵几生平惡齏韭正味不
爾爾淡泊留餘甘久乃得厥旨雖非鼎鼐才用以飭簞簋吁嗟
千里萼尚藉鹽豉美終當裁百本牽機汲流水詎肯不窺園刻
苦肖董子

酒嫌

鄙性不善飲一盞還酩酊頗宜魯酒薄不羨中山醪偶爲卒歲
謀迎蠟筍新糟糯杭白如雪藥麴微蒸敲兼旬作芳馨元箸殊
超超味在濁清間其色浮銀濤未可中聖賢錫名何冶嬌氣慄
過初九肌粟寒生毛淺酌坐深閣入口粘腸膠陽和迴腳底愁
緒除根苗孰貽濡首譏厥德吾將衰但恐有醒時塵事紛相撓
韓幹神駿圖

元如山立如風旋力躡電影馳其前高巔雙壁夾兩頰長鳴思
騁仰視天非花非駁非連錢沃雪遍體銀絲纏奚官脫帽衣祖
偏志不在馬耽清泉怒塵一洗毛鬣鮮耀日不復煩鞍轡涉水
水底蒸雲烟蹄間錯落流珠濺道人注目意靜便相賞逸格通
高禪胡奴韝鷹捉老拳攬身擇肉思秋田矯矯元度跋脚眠桐
花下墜清露妍奇姿絕態尺咫傳筆無瑕痕墨彩圓目以韓幹
然不然先生曹霸差齊肩肉不露骨骨益堅一藝所到參幽元
殘縑寸斷神則全渥洼精氣連星躔支公不作誰爲憐駕轅服
皂紛闐闐千金市此勿舍旃丹青未必留空筌

勉行堂詩集卷之四

古歛 程晉芳 魚門

刻楮集

辛未

春日過外舅宅見素心蘭盛開感賦二首

謝氏門庭九畹珍
驚心還認隔年春
休誇共蒂連枝事
絕似含悽抱怨人
夢冷本無繁艷競
芳幽曾許雪霜隣
一枝零落湘波杳
重到花前是後塵

楚客經年詠澧蘭
就中偏有出群觀
情深恰與幽憂並
品貴從知護植難
空谷荒烟歸弱草
一天絲雨傍疏欄
模糊粉本誰收拾
欲賦招魂淚已瀾

平山堂

昔游平山堂
春早水初渌
老梅六七株
澹艷送微馥
愛茲野趣

深幽賞未云足安知歲六更種花遍巖谷紛披月滿枝璀璨雪
迷目香氣浩不收擁鼻轉嫌觸是日禁烟餘新晴引遐躅歷歷
隔江山幾葉修眉蹙側聞

翠華臨題詩散珠玉大哉太平年群芳表玉燭遂令剽山川一
洗舊寒縮鰕生亦何幸異境恣往復置身花海中意外前踪續
得句無人知新鶯出喬木

觀音閣

蓮花湧千層縹緲結楹柱臺侵碧漢高簷礙飛鳥翥便娟翠篠
淨潏鑣綠雲度清磬澹孤烟天香不知處廣陵盛繁華浩劫經
已屢紫泉失故宮板渚列新墓此地舊迷藏崇樓出朱霧珠玉
委泥沙笙歌廢朝暮何來象教力沛若甘雨澍澹然冰雪天浣
彼胭脂汙方知大慈淨光明徹熒誤落日隱雷塘言尋下山路

法海寺

人天無定居變現等遊戲誰歎慕紺宇構此臺閣麗盤回石磴
紆迤邐朱欄蔽初日蕩高空諸天在金翠茫茫大千界擾擾薪
爭熾性海不揚波浮杯有輕濟回思京國遊蕭寺閑棲憩佛火
夜燈明齋鐘曉搖曳前踪已磨滅復此探元秘南北豈殊途去
來無兩義終當證六因稽首依初地踞石撫孤松翩然飛鳥逝

雜憶詩四首

小住江南古石頭千絲垂柳一汀秋伯勞飛去蓮衣冷盡日無
言獨倚樓

金屋傳來態轉嬌五銖衣薄怯寒宵若教桂殿無新寵那得長
門覺夜遙

柘館瓊宮愛未休依然團扇感新秋江天一碧鷗波遠雉婦漁

師總白頭

却聘寧論十斛珠
白桃花下絳羅襦
休教越網輕收得
掃却雙眉便掃吳

題晚甘園二首

編茆松桂裏蕭寂
面城居急雨聞催棹
涼烟看打魚草香人去
後林澹月來初心事隨
鷗鷺無煩獻子虛
早梅憶初白忽復仰
新槐籜嫩侵吟屨
花繁入酒杯堤邊空翠
合水際夕烟開樹色
濛濛暗鐘聲何處來

養蠶行

柳花未飛桑葉小
家家養蠶春起早
開箱展紙見星星
先祭蠶娘私語禱
願蠶八織絲生光
蒼蠅不害鼠不傷
日中頻曬畏風起
取煖更向懷中藏
伏如虎趺啄如馬
一眠再眠天氣冶
侵晨

不敢對梳頭自移菱鏡迴簷下
颼颼屋壁風雨鳴頭鬢浴罷絲
欲成室中有喜不舉慶怕人來往
蠶神驚冷盆碁布霜盈盤拍
拍飛蛾翅爭颺熟絲滿架待開機
先請長官出新樣

屋舟主人邀看牡丹四首

晚甘花事幾凭欄又訪名園犯曉寒
薄雨輕陰如有意護花留
待客來看

晚香新翠一重重半倚雕欄半倚風
最好夜深清露下月痕微
抹酒痕紅

天桃粉杏芳菲後錦幄酣嬌見幾枝
漫道三春開較晚出他頭
地故遲遲

惜春幾度欲留春曾與名花結淨因
偶對穠華暫相賞不煩稱
疊問前塵

和史梧岡無題三首

碧落昏黃倦倚屏，海棠和月轉深亭。
背經爬後猶餘癢，藥到偷來漸少靈。
烟外柳低褰幕見，水邊簫咽傍船聽。
迴風一曲非難製，點拍何由教蜀伶。

芳信疑真恐未然，一枝玉杏認流年。
人間有劫都成恨，天上無情不是仙。
樓影靜依銀漢側，月華涼到翠帷邊。
芝田作賦渾無奈，珠斗橫斜未肯眠。

牆影迷離樹影搖，病餘悵怯深宵鏡。
飛蟾彩暈防暈燈，結花心未忍挑。
海燕巢新春社近，乳鶯聲細薄寒消。
瑣牕尙有紅蘭在，香過湔裙又幾朝。

送寶意司馬之任施南四首

古人重分手，豈爲離別難。
念此同心去，獨居靡所懽。
憶君昨來

時落花滿南園及茲唱驪駒紅藥開爛熳物候自新故人事多
辛艱綵雪君惜墜錦瑟余罷彈殷殷各有懷其此清淚潛君方
適三楚欲發仍留連才高值數奇宦薄憐家寒臨歧一樽酒惻
愴興憂端

山河蟠直北鳳闕壯王居昔我負劒游留止城西隅君時叩荆
扉欵欵論詩書閒亭或命酒廣陌仍同車秋風一蕭瑟雨細花
疏疏憐我竟下第爲我淚沾裾纏綿賦河梁送我歸鄉閭落日
官道旁執手空踟躕此義古所難寒暑寧忘諸

江流浩湯湯漢水如雪瀆人懷屈賈賢香到蘅蕪重君行作民
牧四野群歌頌承明別宮廬大澤攬雲夢獵騎萬山紅戈船一
帆送吾聞楚多材使君慎磨礪暇日訪仙真雲間鶴閑控
施南昔置衛改府無多年其地最爲遠乃在萬山間山峰削劒

鉅嶽巖難攀援繼烟多舊篋與雨出寒泉其民雜獯獷好爭習
戈鋌北界接巫山朝雲尚娟娟土司號容美好女花垂肩俗異
政不一號稱難治焉側聞忠信孚能格豚魚頑嗟彼衆狃狃覆
轡皆黎元願君勤撫綏慎勿輕輶輶傾耳聆政聲內地期推遷
到日傳吉語慰我心旌懸

仇實父漢宮春曉圖

澄霞舒卷天半紅流鶯細囀晴煙中韶春先到樂游苑金鋪玉
砌光融融翠微五柞連駁安千門盡啟蕤蕤鎖寶鏡當樓理曉
雲玉鈿釵鬢簪嬌朶掃花宮婢雲垂衣驚起蛺蝶成團飛柳絲
低緋不能舞九華殿裏東風微惟有昭陽春最艷珠璣金缸燈
灑灑紫燕休尋別殿巢文鴛競向方塘占何處離宮抱怨深夢
迴隱隱聽車音青陽不道凌朝轉皓月還看到曉沉十洲作畫

工雕繪此卷傳神信爲最似經新露長芳苦如有柔風動羅帶
君不見露寢離宮歲歲新承恩并輦古無倫一朝帳殿生秋草
三十六宮誰是春行人曾過驪山下野土青紅沒鴛瓦蕭森古
木嘯愁鴟落日寒聲起平野繁華如此空摧殘不如長向圖中
看

書在堂諸伶散去兄南坡有詩誌感因和三首

講席禪場笑太拘繁華隊裏悟空虛歌雲漸冷湘絃杳邊屋唐
花靜檢書

迴雪縈塵百態生夕陽花下自盈盈江南散去人爭識曾是南
坡自教成

銷魂一曲感新離醉裏忘情覺後悲爲問香山老居士纒頭何
物遣楊枝

三弟新成舫屋漫題四首

小築成書舫還疑泛碧潯聊舒養拙志未遂出塵心
徑仄苔衣積樓虛月影深不須貪學鍛清響寄風琴

疏燈明斗室示病有維摩茶熟頻開鼎書成欲換鵝
看雲閑挂笏叩缶且成歌結習難除甚新詞幾琢磨

翠篠陰侵幌雲峰澹映軒晚花因雨謝白露向秋繁
草木天隨史蘅蕪楚客言慚予東廨任人說是平原

五柳移家志經年共此情一椽秋樹底還似摘船行
鷗鼠無多飲鳴蜩分外清推移隨物理廣廈豈須營

聞歌三首

宛宛涼釵綴玉蟲當筵却步歛春風殷勤唱到塵詞曲
珠斗穿簾月挂弓

繡騎無端送遠征銷魂意態可憐生酒樽深淺三更雨纔聽西
涼第一聲

愁對雕筵喚奈何無端斂笑更翻歌赤闌橋外潺湲水一夜平
添幾尺波

仲夏同史梧岡邊葦間周白民邱浩亭李情田華半江曹
抑堂家兄萼江姪涵亭過亭集晚甘園次李情田原韻
晴花蕩簾帷密樹帶川浹獨游豈云歡巖壑招衆英雄風開遠
襟澄水愜淵旨茂序行炎曦逝節慨春史翳然松竹陰草蔓石
齒齒鬱彼蒸雲情不用則塊爾遙天散煙光淨境埽文綺寥寥
漁唱清吹籟入幽耳酌泉得芳甘寧待荇馨醴俯檻眺層原涼
波推月起

飲席旣散復與家濯亭過亭登浪勝閣玩月泛舟珠湖作

歌闌燈火歇賓主醵餘歡登樓望素月清氣在林巒慙此酒人
懷曠彼物外觀芳塘明夕景平波試迴沿樵風響遠音叢篠澹
疏烟中流任容與閑語羲皇年但覺夜鐘永不知風露寒他時
續幽思澄水垂綸竿

題劉明揚澹圓圖

荇葉菱花黯澹秋翠烟深處棹輕舟披圖認得曾行處不是西
溪定石頭

寒意寥寥菜繞畦子山辛苦說幽棲何如趙嘏詩中句露柳風
荷到處迷

魚苗水碧侵苔檻燕翦風輕拂荻簾瘦木黃庭支枕讀一痕清
影上初蟾

黃輓綠深道氣濃精廬都被水雲封潭聲竟夜潭疑雨樹隔秋

山何處鐘

漢臯解佩圖

楊枝不動春風弱水面玲瓏現樓閣漢濱游女古來多聯袂仙
姝何綽約蘭臯解佩如相許交甫何人煩爾汝義理終持不可
干擁霧霏烟迷處所君不見高唐遠王區山夢大夫作賦規君
心朝雲暮雨太恂怳豈有神女爲荒淫事當眇漠傳者眞此圖
絕妙疑通神綃衣翠帶悉有韻輕花艷草都無塵楚天凝碧江
波冷往事空濛誰記省深宵展畫對幽窗蘿薜疏疏燈耿耿

盛夏過晚甘園值凌霄花盛開戲作長歌

火雲硤兀升天根綃帷冰簟如炙燂蕭然一碧浸林屋避暑僕
僕尋邛樊老漁獨縱水邊棹高鳥去投烟際村颼颼涼颼拂廣
坐有似酷吏除煩冤凭闌寂眺萬木靜陵君簇簇當窗繁天空

海波千頃綠紅輪忽湧扶桑瞰清芬繞樹恣菲鬱細幹聳日思
騰鸞炎官特乞眞面目霞裳頰佩珠冠禪初疑虬龍互盤踞紫
烟赤霧相吐吞又疑絳宮步虛子芙蓉旗蓋交飛翻曾聞三花
繞禪樹獨傍初祖臨菴門何年種植向深圃紫薇幾本同朝昏
蔓柔屈曲有伸理修枝茂蔭煩攀援何如西京鄭公樹特立四
丈當幽園亭亭裊裊盡霄漢下視凡葉皆兒孫曉曉對花被花
惱坐待夕月生東屯

華半江篆書歌

太陰晝黑雲影涼祝融收威忽走藏衝簷急雨鳴雷硯短歌狂
吟噤蟬蜚誰敲銅鑲響倉琅示我麗篆披琦瑣霏烟鬱霧紛滿
堂迴鸞顧鵲驚翔蛟虬蚴蟉緣堵墻珎戈寶戰爭銛鏑陸離
眯目心惶惶維昔兩維肇分張混沌鑿破開鴻荒天文離披煥

藻章立鳥跋兔交騰驤衆星落落圓銀潢龍書穗書效厥祥奎
宿十六圓不方仰觀俯察沮與倉蟲蠕鳥翥何焜煌石鼓獵碣
傳宣王雙雙趨趨攻車良祖龍刻石誇鸞強丞相搆法垂無疆
特與史籀相頡頏厥體三變不互妨後來隸草徒紛攘亂我肅
穆爲披猖裂棄黻冕尊蒸裳蔡李不作誰登場半江振筆罪古
香回薄萬有歸騰囊法物秘玩如雪肪類鐘印鼎視必詳麟盃
夔匪羽爵觴刀泉貝布參微茫乃稽說文校偏旁嶧山詛楚憑
梯航盤旋蠕扁兀老蒼小篆瘦硬非求長金釵玉箸分行行骨
立矯矯遺皮黻奇特所至唯平常今

皇重學恢璇網國書六體工織襄紛綸

寶翰輝文昌盍摹石經貢天閭豐碑峯兀垂虞庠亦如鴻都列
康莊令胄子習窺黃堂歷千萬載無瑕傷奚爲泐硯銘疏房但

令壁几生晶光余言慙矣勿謂狂矢詩聊以告墨皇

消夏雜詩十首

夏閨頻多雨微涼乍似秋野花隨草漫新水上階流錦幕銜泥
燕芳林喚婦鳩寂窺珠自遣散快坐南樓

耽名仍善病障習幾時除羽客教求藥家人笑積書蘋風新雨
後竹韻夜涼初一笑從前錯繙塵久撲車

虛堂冰簟展松戶晝長局冷况偏宜暑清齋試寫經殷勤撫團
扇寂寞見流螢常恐秋風至群芳怨早零

伏生書竟授王式悔偏增道在寧窮達情悲念友朋霧霏文豹
隱江潮怒蛟騰擬傍嚴灘去寒烟獨下層

北風圖乍展積雪見蒲開朔氣迴平野寒光照遼山朱蕤雪外
隱紅樹水邊閑縮地愁無術何因數往還

科頭箕踞坐客至不能冠竹石一襟淨茶瓜相與餐平生愛閑
適復此共欣歡勿更攜筇去深宵有月看

霖雨閣三日西郊尙密雲慈龍苔覆壁瀾漫水連垠雜暈怒相
競元蟬鳴不聞書生最潦倒懶對舊鉞芒

江漢故人去孤帆天際飛遙憐射堂暑未得解朱紉天淨渚雲

上夜涼汀芷菲應成哀永逝淚濕舊羅衣

有懷商賈
意司馬

舊夢分明在淒涼覺後情簾旌縈午月蟲語遍深更香燼菜羹
帳風搖玳瑁筵起看星漢影忽忽繞階行

憎蠅思拔劍見蠍偶吟詩群動太相擾炎威何日移金鈴舒艷
小白亭唱歌遲稍待清秋日西園倒接離

珊瑚鳥

廣南有鳥毛骨殊芻尼較瘦鵠鵠腴元裾長尾頰雪鋪兩目爛

赤如珊瑚得名以此善自呼吐音圓轉如流珠羅致萬里來庭
隅一鳴春山百花發再鳴秋山印秋月嘈嘈雜雜千百鳴紫鸞
簫間雲和笙忽如荒雞茅店小又如犬吠深林表木魚聲遠貝
多新欸乃歌微煙樹渺子規太悲鶯囀弱鸚鵡徒將巧言託柔
聲宛宛慣依人豈能無憶空山樂珊瑚鳥爾獨不見葳蕤紫鳳
棲梧陰輔以鸞鷟隨貽禽百鳥頻覲紛羽襟爾曷在側揚清音
輕嘯徐吹靜愔愔高卑悉聽平其心毋令反舌獻便安心貪乘
時口求勝鵠臆歛跡鵲鵲翔調以中聲群物定枋榆爾亦閑游
衍海氣連雲歸翼展飲啄林泉養羽毛桄榔葉暗紅蕉卷

初秋遣興用庚午京華旅寓韻二首

畏景炎風忽忽移涼風纔到井梧知朱萼燕語頻驚睡錦瑟塵
生倦覓詩半榻圖書邀素月一簾烟水度三時星河漸朗銀橋

隱始信仙期不後期

青衫原是舊時青棋局何勞怨不平論世安危宜讀史誤人耕
稼是求名碧遮菱港沙堤遠紅映荷塘夕院清回首斷雲關塞
迴揮鞭曾逐曉鴻征

見螢火作

丹良亦何微草孕乘濕化點點弄商風輝輝送朱夏偶甘白鳥
羞暫拂珠帷罅石火訝分流星芒忽交射蕭蕭竹閣深冷露無
聲瀉點綴旅人衣飄零書客舍悽迷隋氏苑黯澹巫山夜將雨
弔叢花和烟撲涼榭深宮寵愛移志士年華謝幾許觸秋心凭
闌動悲詫

聞促織作

西風一蕭騷涼葉下庭樹野水浸虛亭煙華引輕素夜增多促

織唧唧如哀訴碧月照羅幃欲寐轉愁寤豈爲織作難趣勸成
縑布機女怨秋燈勞人感時暮丁丁窮巷砧相雜聲屢度攬衣
候天明草間有新露

七夕篇

空堦蛩語天如水竹影搖搖深樹裏長笛聲中一倚欄星河不
動閑雲委首節迎秋又此年商飈素景劇堪憐鶴盤芝蓋繩橋
就雨洗龍駢翠罕懸昔離今聚寧酬願洒淚迴車空有恨碧海
青天暮色寒姮娥較似還多怨丹禁從來重此宵九光燈啓夜
迢迢紅粉席中牽繡縷珊瑚窗裏度銀簫金塘風起芙蓉夕幾
度齋心候仙客侍臣初竊紫文桃西母將留瓊鳳歸永巷長門
漏點長偶停紈扇感螢光白玉砌深芳露冷水晶屏掩夏綃涼
江南是處娛佳節酒釀明星錦筵設巧心終擬玉梭投密意還

將絲繒結何處空閨感倍新珠簾高卷盼天津妬他牛女經年
會遠憶關山獨夜人由來舊說皆成幻擾擾人間悲聚散空傳
海客問支機幾見雙星度雲漢總爲關情易引愁芳時蘭服軫
新秋潛郎此夕難成寐初月朧朧照綺樓

讀商寶意司馬自建業至楚中懷古諸什邾和八首

白門疏柳映青山夕照零鴉自往還詞客淹留原易感故宮花
草最相關魚龍卧穩秋濤長蘆荻寒生戰壘閑輸與滄江漁釣
叟一燈長占白雲灣

白下

涼雲幾葉鎖神旗靈澤祠前碧草霏伐國陰謀憑衽席還家秋
夢失芳菲波澄遠渚埋金劍雨響寒林振玉衣寂寂永安宮外
月夜來宛轉照螭磯

螭磯

亭外江流欲拍天琵琶往事自今傳征人踪跡嫌風月謫宦情

懷托管絃雨颭浪花如送客鳥眠沙嘴故依船後來豈少青衫
淚持較香山倍可憐

琵琶亭

荒原誰識古苑居白雪樓高韻轉孤志士低徊感楊柳騷人哀
怨長蘼蕪燭龍顧兔天難問犀甲吳戈鬼可呼椒酒東皇尙祠
廟紛紛歌舞集神巫

郢中

夷陵一炬訝秦灰廢苑遺宮但野苔麋鹿迹隨芳徑杳雁鴻聲
入曉雲哀細腰善舞憑新寵長鬣當筵詡異材千古繁華一回
首蒼蒼寒日下高臺

章華宮

岑牟撾鼓太清狂按劍何人損夜光終古靈禽怨才子一川芳
草自斜陽禿巾作達憐文舉伏地求哀笑孔璋我有楚騷歌最
愴不須南去弔瀟湘

鸚鵡洲

霸氣樊山舊有名蜀吳曾此事紛爭紫髯大帝猶臣魏白面書

生最解兵水色靜連黃葢浦月華遙接呂蒙城高樓縹緲雲間

起惟許仙人控鶴征

樊山

北軍百萬駕艨艟一戰曾收鼎足功山水相蒙成地險蛟龍得
雨起池中霜侵老樹驚鳥起雲掩牙旗斷岸空無恙散花洲畔
路估帆來往任東風

赤壁

倣唐人本事詩三首

綺窗如水月低眉銀燭雙清照羽帷花氣撲簾棲燕穩朦朧曉
色覺來時

十五王昌嫁未遲盈盈畫閣學嬌癡西風竟夜吹雲冷桐葉飄
搖上曉墀

遙妬分明淚轉多秋星點點照銀河那知雨夜西亭客獨擁寒
衾聽亂荷

李芋圃太史次和京華舊作三首見懷作長歌奉答

層雲忽開唳元鶴綠字書從天外落京華故人知我愁無聊示
我新篇酬昔作朗吟達夜燈火微林桂紛紛香漠漠擁衾不寐
重太息却憶前年寓京洛琳宮老樹淨無煙城港初荷青見萼
衝泥誰惜錦鞍韉痛飲休辭銀鑿落此時意氣太豪雄匣裏錚
錚撫干鏌那知無賴到秋風失路人歸理行橐滄溟已運有窮
鱗碧落雖寬少翔鶚故人欵曲侑離樽古道斜陽意蕭索殘山
幾疊卷征雲瘦馬單行踏寒籜黃花黃葉古郵亭猶夢招同看
花約西風轉眼又經年南北參辰頻嘆各珠湖昔游殊歷歷卧
柳敲松繞城郭十年燈木已成陰千頃晴波倦停泊君今玉堂
雖緩步八口嗷嗷情味薄太倉糴米不充饑瘦聳吟肩長戍削
我愁家居恒鬱鬱欲過屠門甘大嚼丈夫書劍徧天涯肯帶閑

情對闌閣語君待我握手春明門一笑東風解紅蘚

答儲茗坡

黃河凌兢冰崢嶸送君去作金臺行西風蕭瑟桂露白念君久
作金臺客金臺雖好不可以久居食無魚兮出無車何況江南
米珠薪比桂思家念遠愁心繫暮春繚繞長安街酷想尊鱸少
歸計君不見胎禽矯矯毛骨豐飼以玉粒棲樊籠清宵霽月但
悲嘆志不在飽思飛翀君爲進士不得進幾點繁星生旅鬢我
年及壯尙儒冠行道入逢笑懷瑾男兒立身當自全區區窮達
須信天釣臺風清市門隱古人視我寧非賢君今但少二頃田
我亦終老溪巖邊銅官山中一相遇劍花拂指彈秋蓮

贊社舟中

澤國蒼茫裏雲帆一葉過亭荒秋樹少湖濶夕陽多漁舫有時

集勞人何處歌依依淮浦月相送耿金波

自慰

偶舉隻觴還自慰天公厚我我何堪積書千卷不謀食生女一
雙殊勝男柿葉紅深停畫舫梅花香透上春簪他時更傍西泠
去瘦竹欹槐築小庵

舟中曉起

西風稍戒嚴中野葉聲乾輕衾不成寐凜然知夜寒起視天宇
晶殘蟾尚娟娟稍稍遠鐘鳴泠泠草露溼晴霞在林薄流波急
潺湲覽彼物候異識此時序遷風霜久已飽無事興憂端

辛未八月與楊鑑堂過於邗江訂平山之遊予以事歸不
果赴約成長歌一首奉寄兼簡家蓴江兄

春風園徑滋紅藥幾度期君君負約青燈搖曳酒鱗浮忽忽當

筵憐寂寞我來恰值廣陵秋
澹沲晴波映烟郭蜀岡清遊豈不
快歸計倉皇轉慚忤人生會合亦有數
往往前期費商略袁江
枝里去幾許一歲能圖幾
歡噉孤梅綻後狂雨多野艇歸時怒
雷攪

記鑑堂前
遊所遇

信知天公有深意只許閑愁妬行樂
平山堂下

舊遊歷卷起松濤崩萬壑
千年野跡想紅橋一帶垂楊傍東閣
萼鄉老兄足高興應共攜筇著芒屨
凭闌眺遠念歸棹一俗難
醫供笑謔豈知繁華塞城市子子閑身少安著知君自是妙蓮
花泥土何曾汚香萼歸人鴻爪失前踪
寓客山僧駐行脚終知
白業可安心莫晒黃金工鑄錯
南園霜菊遲同看罰醢先行我
先酌

卽景

殘陽忽已暝漠漠重雲積
香草水邊祠垂楊雨中驛
漁汀散遠

烟倦鳥投驚翮何處棹歌聲迢迢廣陵隔

洛神圖

翩如驚鴻矯游龍蕙烟蘭霧紛滿空流精轉眄動光彩瓊瑤翠
佩輕迴風東藩歸去愁心劇馬殆車煩日將夕徙倚岷阿若有
人芙蓉一朵涵秋碧才雄八斗作賦難盈盈羅襪生輕瀾水邊
漢女工游戲天上匏瓜足怨歎憑夷擊鼓文魚舞神去神來澹
雲雨鵲鳥無媒感盛年太陰寂處誰爲主衡山作畫如作書細
心密繹游于虛神光離合作入手後有作者安能如君不見五
官風雅冠當時拭面曾驚絕世姿殿外涼風吹落葉霜前脆柳
隕清枝荒唐授枕知真偽見畫聊須參了義波光不定月輪舉
岸草汀花盡幽淚

李伯時畫郭汾陽免胄圖

黃塵漲天鳥不飛鐵騎百萬爭合圍鼓聲崩雷角嘯野搖動三
輔驚京畿有唐中葉運數否外有羌戎內安史何人隻手扶天
綱功業汾陽古無比卽看兔胃一幅圖龍眠妙手工追摹霜風
淩殺氣纔援軍未集兵勢孤長戟非鉞劍非利與鬪精誠弗
鬪智幅巾緩帶出轅門侃侃片言中大義酋長羅拜面發赭豈
惟身服心盡傾五體投地若無骨謂公已死公猶生大人之占
信奇應蓋擊吐蕃爲汝贈膏流原野髮填渠畢昂中間光稍定
白描妙手能得真令公氣宇霏陽春紛紛敵騎若碁布左右環
繞皆安馴後有朱旗風颭濂寶甲琬弓列驍將似遵嚴令不敢
前瞥見輸誠語相向側左一騎真飛龍鐵葉裹面花飄鬃大將
之威在名馬辟易萬陳嘶雄風郭公之功李生筆矯矯神姿兩
無匹想像揮毫點染時層層壁壘胸中出君不聞臨淮殺賊如

刈草晚節功名不自保又不見幽燕一失無長籌終唐之世不
復收奸人據內掣肘腋雖有良將難爲謀我披此圖重於邑如
公但藉匡危急忠忱不獨格花門異日朝恩還下泣

父庚觚

尊收積氣凝堅剛銅英布濩草木黃何年采鍊鑄法物破觚爲
圓稱有商商人敬鬼惡不祥制器立象殊精良雷紋震疊百物
懼饗養森列群邪藏尊彝罍觶爵觴因時備用各有常觚戒
德孤寓深意如置監史立兩旁數千百載韜古光何人掘取歸
縑囊想當埋瘞向深土野火與赤苔與蒼輕雲油油復煌煌相
對肅穆嚴冠裳父庚之銘義何取篆法直逼誦與倉十千作名
厥首彰亦如祖丙父乙難追詳或云字跡尙垂穎無乃祈穀供
烝嘗句吳於越米價昂斗錢四百嗟奇荒上天殷念恤黔赤五

風十雨肥秋秧禾頭斑斑麥吐芒庚金成實司西方宜舉此觚
答天貺灌實鬱鬱羞馨香職思其居賓稼穡毋使沈汨譏太康

太白樽

柴窑片瓦敵拱壁何況世遠誇唐磁竭來古樽製何代龍文坡
碎銜雙螭云是太白狂飲之酒器其說杳眇難深稽質純釉細
色澤厚當是宋人摹倣之所爲堂堂謫仙人矯矯翔鸞姿紫宮
青府不稱意偶來人世窮兒嬉長安道上馳八姨楊花撩亂天
迷離心知禍亂口不語胸中磊塊憐千卮金龜賀監解玉硯妃
子持將軍脫靴不足顧彩毫落紙驚淋漓江南蜀道頻流移子
規叫血猿猱悲糟邱麴壘氣彌壯春江吸盡青琉璃團團牛渚
月湛湛謝公池手撫力士錯笑把桑落枝飄然騎鯨忽歸去天
風吹髮涼絲絲金門歲星不可見但見柳旁三點颺酒旗殘杯

剩勺到處有後人傳寶如瓊琦此樽遺制特奇古想見醉倒冠
巾歆嗟我兩長無一得不能豪飲兼吟詩膽銅在手汲新水插
花植卉爲清怡沈香亭畔牡丹少一枝隨分新胭脂

諸葛飫

瀘溪毒浩不可渡五月炎風吹墨霧射工藏影伺人過跼跼
鳶墮深樹武侯用兵疑有神不毛深入搜峒岷強酋玩弄在股
掌七擒七縱蠻心馴流傳青銅脫粟飫土花暈彩光磷磷其腹
稍寬附雙耳馬鞍側挂堪隨身盤旋數層作蝸篆覆以高蓋遮
靈塵中深外小特精便一物用心彌苦辛昔聞沈舟破釜誇項
羽匹夫健鬪吾不取指揮羽扇運長籌士有餘糧飫堪煮想當
月白萬馬停箐篁密翳炊烟青誓將滅此始朝食戈鋌力掃蠻
風腥南征纔定議北伐兩表忠誠懸日月木牛流馬艱轉輸屢

因糧盡歸倉卒吁嗟乎天心未厭當塗高雜耕嘔血心徒勞蜀人金鷲魏人奪他時三馬還食槽祇今一甌人爭寶想像雄師服夷獠商彝周鼎共尊嚴髯几華堂安置好君不見蜀中遺像鬱崢嶸俎豆芬馨檜柏清落日黃苗齊賽廟年年銅鼓振秋聲

聞雁有懷商司馬寶意

蘿庭風細月孤清哀雁雲中送遠聲木落早知芳序晏天寒宜愴別家情江空露冷人千里鬢短愁深雪幾莖不用衡陽寄書信故人近在武昌城

九日同人遊南園用東坡九日黃樓韻

去年重九何堪說制淚曾看秋榜發西風打面雨沾衣宣武門東泥滑滑呼童戒且速脂車還我青蓑舊巾襪豈無清醕百壺多潦倒心情慵一呷今年淮水菊舒黃載酒城西還荷鋤翻紅

柿柏葉逾明漸老蘭荃霜未殺殘霞舒歛夕陽低遙見鱗鱗露
寒剝年華逐水共推移詩思如絲忽抽軋高樓百尺試閑凭烏
帽風吹倩花壓吾儕守身譬珍玉寧使沈埋毋缺齧儘嘗甘苦
耐茶飴待放狂歌駭鳬鴨不須高會羨龍山如此湖光勝苕霅